

# **Ajwavi we gbexo**

**Lena otoviye na hεn do a do yi owan na  
εmε xeye ni bε SIDA we adɔn ye, a bo mɔ  
do kpe ɳukunsin do ye wu.**

## **Sukluvi we wema**

**Association**

**Saxwεgbe na yi ɳukɔn**

**Ototahɔnnu Doutoutɔn**

**Otomimavi Houéyogbétɔn**

**2013**

Langue : Saxwε parlée dans le Département du Mono,  
commune de Bopa et de Houéyogbe, Bénin

Titre en français : L'histoire de Kande. Ce qu'une communauté peut faire pour aimer les personnes atteintes du SIDA et pour s'occuper d'elles, Livre de l'étudiant

Traduit par : Patrice VIDEGNON, Godefroy SOSSOU et David Y.  
HOUNKPE

Traduit de « L'histoire de Kande. » Ce qu'une communauté peut faire pour aimer les personnes atteintes du SIDA et pour s'occuper d'elles, Manuel de l'étudiant

Adapté par : Kathie Watters et Margaret Hill

Illustrations : MBANJI Bawe Ernest © 2007, 2009, 2011, 2012

SIL International  
ISBN

A utiliser avec « L'histoire de Kande. » Ce qu'une communauté peut faire pour aimer les personnes atteintes du SIDA et pour s'occuper d'elles,  
Manuel de l'animateur

Traduit en français par : Mary Endersby, Kabucungu Hand-jinga, Nathalie Saint-André, Ann Wester, Pauline Joliot, Uschi Lautenschlager

Histoire et illustrations adaptées des livres « Histoires de Kande, Livres 1 à 5 » © Shellbook Publishing Systems ([www.shellbook.com](http://www.shellbook.com)) 2004. Utilisées avec autorisation.


SIL International autorise la reproduction de ce livre à des fins non lucratives ou la traduction de ce texte, pourvu que la source et le droit d'auteur soient mentionnés et que le texte ne soit pas altéré plus que nécessaire pour une bonne traduction.

Pour plus de renseignements, contacter [uschi\\_lautenschlager@sil.org](mailto:uschi_lautenschlager@sil.org)

© 2013 Saxwεgbe na yi ηukɔ́n

# Oxota Tantyan 1

Oxo hwihwla míancton






## Mi se Ajwavi we gbexo.

Gbedopko, Ajwavi xlɔn onyi le otิงɔ bo lo xlɛ wema nɔ, nɔvye nyɔnusi Afi bo do odun va e kɔn.

E bo lɔ ni-i tun mɔ : « Ajwavi, Ajwavi ! Ko se nyɔnu qeye lo lɔ oxo qe nɔ fifi. Ye tun mianɔ bo hwla oxo qe nɔ. O nyɔ oxo la wεε ? » E dɔ e wu ni-i tun mɔ : « Nɔvye kpe, e qì tun ko nyɔ-ɛ. » « Mí a yi kan mía nɔ se tun oxo ηukɔ lε tututu jaa ? Mí a do odun na mí a kpɔn εmε xeni na je ηukɔn ! »



Ajwavi kpo Afi kpo do odun va oxwegbe, kpodo εde le onu, bo gbo nɔ hεhεhε. Ye nɔvye nyɔnusi xeye ni nyi : Asiba, Kwesiba kpo ye nɔvye ηusunglo xeni nyi Kɔjo se εde kiko yetɔn bo zɔn kpe ye. Ye bo zɔn yi yenɔ kɔn. Yenɔ bo lɔ na ye tun mɔ : « Mi wa jiji, miatɔ lo dɔ awlɔn nɔ ! » E bo dɔn ye tε le xɔmɔnu. Afi bo kan-ε se tun mɔ : « Naye, mi hwla oxo qe do mí nɔ wεε ? » Zɔndokpo kρoŋu, yεnɔ sɔ cɔn qe adɔ ji bo tun mɔ : « Xwedo miatɔn na su. »



Ye nɔvye Kwesiba xeni dɔ oxwe εnε lɔ tun he bo na yi lɔ na he didaye, gbɔɔn na e na jɛ nɔnɔmɛx jɛ, ou wle alɔ ni-i bo tun : « Ovi, didawe o se-e, jo-e do ni a gbɔjwɛ. ». E ve na Kwesiba, dɔ e yi owan na εgbɛdida kpo otɔ. Vɔ, sɔn azan viđe mɛ xɛn, ou nɔ gbe ni-i tun ni boo ká bɔ do otɔ wu. Yetɔ la ci xɔmɛ fifi azan jɛ, e ko mɔ kpewu wa odan ti nɔ. E qitɔ seju, bo nɔ kρen εkρyɔn nɔ taju, agbɔ bo nɔ kpe-e nɔ. Jikan bo lo so xwedo laye nɔ do e wu.



Gbedokpo, Ajwavi yi oxwi, bo lɔ na hadwe etɔnye tun gomi bo le he naye si. Hwanjavi qokpo se oxo la, bo jɛ kiko-e ji bo tun : « SIDA na le ovi la wu qì otɔ ha ! »

Ajwavi ɔn se oxo xena hwanjavi la lɔ nɔ, gɔnmɛ. E lɔ le eɖe mɛ nɔ tun mɔ : « SIDA ɔn le didaye wu, vɔ, oxojçxo wɛ na nyi oxo xe ? » Hadwe etɔnye lɔ ni-i tun ni boo jo oxo mɛ do.



Le ozan mima mε, Ajwavi kan onɔ se tun mɔ : « Míanc, ko hwɛn ma, mi lɔ oxoçxo na-a, SIDA le míatɔ wu wɛɛ ? »

Ajwavi onɔ bo do okɔ odo. Ajwavi bo kpɔn tun onɔ la bo lo fan avin nɔ. Onɔ bo lɔ ni-i tun mɔ : « Ko le dɔñudunu mε, qɔ emeeye nu wε o va yi se oxo la le. »

Ajwavi mɔ kan se tun mɔ : « Na míatɔ ku qε, naqε mí na hεn qɔ, a do kpɔn onuqdu kpo oho kpo a do nɔ εgbε ? »

Onɔ qɔ e wu ni-i tun mɔ : « Mawu na kpedo mía wu. » Ye eme owe laye bo fan avin.



Ogle dan wε na bε kεqε kpoŋu, Ajwavi otɔ bo ku. Hadwe etɔnye kpo xwedo etɔnye kpo fan avin na oku etɔn. Ajwavi va bu otame nɔ tun mɔ : « Elε dɔn na εmεye ɔn do va le hwexenu na didaye qokpo le adɔn we ojan ji bo lo se vivε nɔ ? Gbɔxwe miatɔ na do ku, agunkplɔtɔ la qokpo gee wε nɔ va kan-ε kpɔn.



Osun n̄emu d̄e va yi, Ajwavi kpo ono kpo zon kpa kpa do yi nake da gbe. Agb̄o je ono kpikpe ji, e bo gbo no d̄okro-d̄okro. Ajwavi bo do ala abo me ni-i, bo sɔ-ɛ sɔ xlɔn onyi na c̄eju vide. Ono l̄ ni tun m̄ : « Le hwe d̄eye nu, e no leq̄i ko no m̄ d̄o hɔnhlɔn na do wa odan leq̄i saatɔn ha. »

## Oxota Owego 2

### Vivε siseye mɔ syεnxu le Ajwavi we xwedo mε nɔ




Ajwavi kpo kpo kpo nɔlx o onyi le otingo. Lanme ɔn kɔn na  
ou agbɔ bo kpe-e gbɔɔn Ajwavi gbɔjwɔ do al abo cɔ  
ni-i, ni a do kpewu site.



Ajwavi otɔ o ku. Gomi bo le onɔ si, agbɔ bo nɔ kpe-e nɔ. Vikpɛ laye dɔ na do hɔnħlɔn a do wa odan taŋu hugan saatɔn. Ajwavi nɔ do axwa do ota na nɔvye nyonusiye nɔ le hwexenu na ye ɔn wle obyo na odan wiwa nɔ, cu onɔ cu yi owan na axwa dido mɛ la. E bo nɔ lɔ ni-i tun mɔ : « Đo oto ! Ká mɔ do axwa do ota na nɔvvweye, xena ye kpewu mɛ ye wasi nɔ. »




Gbedokro, nyunu cɔcivi owe qeye va kan ye kpɔn le oxwegbe. Đokpo nyi doto, ḥokpo bo nɔ to dindɛn ganji. Ye nɔ va kan ye kpɔn eji-eji. Ye nɔ hɛn onuqudu va na ye, bo nɔ kpedo ye wu le oxwegbe we odan wiwaye mɛ. Ye nɔ xo dave kpo ye, a bo to hwenuxo nywɛ-nywɛye na ye. Fifi, oji nɔ jɔ Ajwavi, ḥo tun e kpɔn ouɔ va ko εdε nɔ vivi.



Gbedokpo, Ajwavi se ono kpo doto nyɔnusi la kpo lo lɔ oxo nɔ. E ɔn se oxo xena ye lɔ nɔ zɛtɛye gɔnmɛ, vɔ, xena e se gɔnmɛ wɛ nyi tun otɔ nɔ nɔ ogbeji na ono. E bo va yi bɛ owanvi xena ye nɔ yɔ le flansegbe mɛ tun VIH xeni nɔ do SIDA we adɔn na εmɛ, le nyɔnu bu wu dogbɔn oxo qidɔ mɛ.

Míatɔn nyɔ-ɛ tun owanvi VIH SIDAtɔn bo le he wu ye, na e nyi tun e do nyɔ-ɛ wɛ, be, e ɔn do na míanc nɔ. E ledi naye bɛ owanvi SIDAtɔn VIH la le míatɔn wu. Tanyɔ ovi xeni le dɔmɛ la can, e na bɛ-ɛ le naye wu. Doto la lɔ na naye tun e bo dɔ na va dotoxwe na ye a bo do glo εhun etɔn kpɔn.



Xena míanc yi dotoxwe, doto la yi εhun etɔn bo va yi da-ε kpon, bo va trɔ do ogbe ni-i. Le onyihinhɔngbe etɔn, e do ogbe na Ajwavi tun he bo bε owanvi SIDAtɔn. Míanc bε owanvi SIDAtɔn, tanyɔ ovi la can na bε-ε.»

Doto la va lɔ na Ajwavi onɔ tun, e bo do na qυ otinkunye kpo omaye a do kpon hɔnhlɔn do lanmɛ etɔn. E mɔ va na tinkɛn deye wu-i ni a do kpewu zan na adɔn deye. Tacwε na Ajwavi onɔ la do wε nyi tun dotoxwe la ɔn do tinkɛn xeni nɔ xo εvun kpo owanvi SIDAtɔn xena ye nɔ yɔ tun ARV. Ajwavi onɔ bo so jikan do mεyε la wu nɔ. Bɔ lε e na kpon



tinken ARV me la, le na mεyε la ḷn mɔ do bε owanvi  
SIDAtɔn la nɔ ?

Míanc we adɔn la va syεnxu nɔ. SIDA we owanvi la lo ji do  
eji nɔ. Fifi, míanc be SIDA seju. Abiye le numε kpo  
gbazamεye kpo ni-i.

Ajwavi kan nyɔnu cɔcivi laye se tun : « Na ko qo alɔ naye  
wu, ko na bε owanvi SIDAtɔn wεε ? » Doto la qo e wu ni-i  
tun mɔ : « O o ! O ḷn bε-ε nɔ, mɔsinha ke, e hyan owan yiyi  
tɔwe kpo kpedewu tɔwe. Doto la kplan walɔ nywε xena  
Ajwavi na zan a do kpe ɲukunsin do onɔ wu, a bo do qɔ  
onuɖuɖu adodweye ni-i. Ajwavi kan do e ji tun he bo  
kpewu na zɔn adɔn na he naye.



Naye ji mεyε la vɔ, agbɔ bo kpe-e taŋu. E ze ovifε la, ze wε e ze-e kpoŋu bo bε avin, bo tun : « Yatima ! Yatima ! » e gɔnme nyi « Tɔcɔvi-nɔcɔvi. » Azan de ma jε mίanc ku, ko bo na nyikɔ ovi la tun « Yatima. »

Ajwavi ze ovi la do abɔ mε bo va yi xlɔn onyi le otingɔ bo tun : « Ko ɔn jlo tun o na nyi tɔcɔvi-nɔcɔvi, ovi tεye wε o nyi fifi. »

## Oxota atɔngɔ 3

Onu baqa xeye ni jɔ le Ajwavi we xwedo mɛ





Ajwavi le onyi xinxlon le otingo, bo na onuqudu novye nyonusi Yatima no. Ajwavi jlo na kpɔn nyɔnu ovina xeni na no na anɔ ovi la vɔ, xeni zun tun SIDA wɛ hu ono la, ye no vɔ no tun ovi la bo na va do adɔn la na heye. Cɔcivi ɔye kpedo Ajwavi wu bo xɔ onyibunçsin cuçwo vifetɔn na mεye la. Ye bo kplan-ɛ lena ye no sɔ ɛsin fiftye, a do xo adan, kpodo lena ye no na adan la vife do.

Yatima le nywede e bo vivi na Ajwavi no.



Gbedokpo, Ajwavi nɔvye ɲusunglovi xeni nyi Kɔjo, va lɔ ni-i tun : « Ko ka jo suklu do nɔ, qì myɔ kpo Afi kpo tɔn ha. »

Ajwavi lɔ ni-i tun : « O o ! o dɔ na kpe ɲukunsin do sukluyiyi wu, o ba do va kpedo mía wu. » Ðo oto, a bo se Kɔjo, o dɔ na cɔ ðiwe do oha dido kpodo ɲusunglo xeye ni nɔ nu ahan sinsyɛnxu nɔ ye wu ; a bo mɔ cɔ ðiwe do xeye ni nɔ kan nyɔnusiye do dan nɔ ye wu. E nyi onu ahan sinsyɛnxu nɔ, tagbɔ ɔn hun na we nɔ, mɔsinha ke na o dɔ nyɔnu ðe de, o teñu bε owanvi SIDAtɔn VIH. » Kɔjo fyan jɔgbe na Ajwavi tun, he bo na wle obyo na sukluyiyi wu ganji, a bo gbɔn akpa na nyɔnu kinkan kpo ahan sinsyɛnxu nunu.



Gbedokpo Ajwavi tɔkpɛ va e de, bo tun : « Le oxwedogbe miatɔn we osen mɛ, xena didawe ku fifi, nyixɔ xe la trɔ zun tɛye. » Ajwavi do axwa bo tun mɔ : « Awoo! mí ḷn dɔ ofiti bo na nɔ mɔ ! »

E dɔ e wu ni-i tun mɔ : « Ahoho ! E ḷn kan do ofi dɛ. Ko na dɔ ohyan oxwe la tɔn zaandɛ. Be sɔn egbe, ko na nɔ yi oglenukun miatɔn zetɛye we mamɛ le mia si. »



Xena ozan do, Asiba kan oxo me la Ajwavi se tun mo : « Be mí do na tɔn le oxwegbe míatɔn la wεε ? »

Ajwavi bo tun mo : « O o ! Míatɔkpε tun míye hεn, míye bo na nɔ bwε gbɔxwe. Vɔ, mí do na na mame dokpo oglenukun laye tɔn wu-i »

Asiba tun : « Be onu kaka dε ɔn mo drɔn na mí nɔ mo ! Mí dø na dε susu bu a do kpewu zan εgbε míatɔn. »



Gbedokpo, Ajwavi kpo Afi hen ovi la do yi dotoxwe no na ye a do glo-e kpɔn, xena ye sɔn no, Afi kpɔn hwanja xeni na alɔgan wu-i le oxwi mε, e bo le ote, Afi bo lɔ tun mɔ : « Hwanja mε, wε na-a alɔgan xe wu, tanyɔ e hen, e na kpedo mía wu le ohyan míatçnye mε. »



Xena ye va dotoxwe la, doto la glo ovi la kpɔn bo tun e bo le nywɛde, vɔ, ye bo na tre na sunzan susu keñu gbɔxwe a bo glo εhun kpɔn ni-i tun e do owanvi VIH SIDAtɔn jaa.



E mɔ va do okplangbe na Ajwavi kpo Afi kpo do oxo xeye ni kan ɲusunglo kpodo nyɔnusi xeye ni dɔ oxwe yetɔn ha, bo tun : « Xena mi nyi tɔcɔvi-ɲɔcɔvi, ɲusunglo qeye na jlo na sɔ onuduqu kpo ajɔ nina εmε, a do zin mia ji, a bo dɔ oxo kpo mi. Mi ká na ye a bles mi ɖu ! Đo, afɔku susu wɛ le, xeye ni nyi gomi yiyi, owanvi VIH SIDAton bibɛ, alo adɔn xeye na oxo qidɔ, nɔ hɛn do va ye. »

Afi tun mɔ : « Ko lo kan diye se nɔ tun, hwanja xeni na-a alɔgan, alo e do εyε wu nɔ na do nyɔ onu na ko nyi wεε ? » Ajwavi, Afi kpo Asiba fyan jɔgbe na yenɔnyɔye bo tun heye bo na nɔ alɔ ji gbɔɔn a bo va wle alɔ.

## Oxota εηεց 4



Ajwavi trč qđ omčnu kpinkpčn



Vivε sise o hugan Ajwavi kpo nɔvye kpo. SIDA hu otɔ kpo onɔ kpo. Na do kpe ɲukunsin do nɔvyε nyɔnusiye kpo ɲusunglo kpo wu, e zun tagba ni-i. Ogan deye mɛ, onuqudu nɔ zun tagba na ye vɔ, Ajwavi bo nɔ do hɔnhlɔn a do kpe ɲukunsin do ye wu. E jɛ gbagba do nyi onɔ na nɔvyε nyɔnusi ovifɛ la.



Gbedokpo, hadwe yetɔn Kofi va kan ye kpon. Hwanjavi la nyi dɔmɛ nywɛ nɔ de bo nɔ dɔ sisi na Mawu. E bo nɔ hɛn nɔvye ɲusunglovi do etɛ do va. E bo nɔ lɔ na Ajwavi nɔ tegbe tun mɔ : « Va mí a yi cɔci ! » Ajwavi nɔ lɔ ni-i tun : « Gbe bu gbe can, dɔ odan su le okɔ na fifi diin. »



Kofi ko nɔ dokpo oxo dɔkpo mɛ la lili ni-i, gbɔɔn do yi gbe xe gbe, na Ajwavi nɔvye nyɔnusi Asiba va lɔ tun : « Ko na yi, tanyɔ ko na yi okplan qe耶 le blɛ. »

Afi tun : « Mɔ can na yi, tanyɔ ko na yi do hadwe yɔyɔ qe耶 le blɛ. »

Ajwavi lɔ na ye tun : « Be mi bo kplɔ Kwesiba kpo Yatima do yi. Mɔ kpo Kɔjo na ci onyi a do wa oxwegbe we odan laye nɔ. »




Xena nɔvye laye gbɔn, ye va to cɔciviye we ɛjikpa we oxo na Ajwavi. Ajwavi bo lɔ tun he can bo na bɔ do ye wu. Cɔciga laye bo dε omɔ na ye tun ye bo lε ogle le nyigban qaxo dε ji. ɛjinukun zεtεye xena ye na do bo na nyi yetɔn, ye ba du a bo sa le oxwi mε. Ye wa odan susu onu bo va le ye si hugan saatɔn.

Afi hεn fifi e na trɔ bε suklu.



Gbedokpo, Ajwavi otɔkpε do εwεn qodan tun ye boo tɔn le yetɔ we oxwe la gbe ; tun oxwe la kpo ogle la kpo bo ɔn mɔ nyi yetɔn. Ajwavi ci dɔŋjuqunu mε. Nyɔnu cɔcivi qɔkpo kplε ye do sɔn yi oxwe etɔn gbe. E bo nyi εmε qɔkpo le nyɔnu xeye ni nɔ kpedo ye wu hwexenu yεnɔ le εgbε. Nyɔnu la we oxwegbe ɔn dεn do cɔcixwe la kpo εjikpa la wu. Ye tɔkpε la qo alɔ oxwe la kpo ogle la kpo ji, vikpε laye bo ci nyɔnu la de.



Ajwavi kpo nɔvye ye jɛ odan wiwa ji le εjikpa yɛtɔn mɛ le cɔcixwe. Afi kpo Asiba kpo bo kplan omɔnɔn titɔ. Ye na ogbe ye na ye a do zan omɔ cɔcixwe la tɔn ye. Kɔjo bo kplan otinkpatɔdan le cɔcixwe la we odanwaxwe.

Le vivɔnu etɔn, Ajwavi can bɛ cɔci la bɔ do nɔvye ye wu. Blɛ la wɛ agunkplɔtɔ la va to Mawu we oxo do kplan onu ye do lena ye na zan εgbε yɛcɔ bu qɔ. Le ɲukɔn yi yi mɛ, ye εmɛ zɛtɛye yi ogbe na do zan εgbε yɛcɔ mɛ la.



E nɔ do jijwε na Ajwavi tun Kofi nɔ va wa odan kpo-e le ejikpa la mε. Hwexenu na ye wa odan nɔ, Kofi nɔvye ɲusunglovi la nɔ da ɛgbε kpo Yatima nɔ. Xwedo Ajwavitɔn le jijwε mε. Tanywε na ye qo, owanvi VIH SIDAtɔn ɔn le Yatima wu.

Ajwavi lɔ na Kofi tun mɔ : « Xena naye kpo didaye kpo do ku, ko bu-i tun xwedo la zεtεye can bo na ku ha ! ɛgbε la gbe syenxu do mí nɔ vɔ, Mawu na mi omɔnu kpinkpɔn do swε wu.

## Oxota atungo 5

Ajwavi we otoviye kplan onu sɔn  
SIDA we adɔn wu





Oxwe qokpo ha godo, Ajwavi lɔ na Kofi tun mɔ : « Otota  
míatɔn we cɔciviye kpedo mía wu tanju ! bo na ogle mí tun  
míye bo lε-ε. Ye bo na mí susu na mí na do kpe ɳukunsin  
do mía qe wu, hadwe vena-vena wε ye nyi na mí. Onu  
nywε qaxo na ye wa na mí, ko ɔn nyɔ lena mí na do εkpe  
etɔn na ye dɔ. »



Azan de ma jε, Ajwavi we cɔcixwe la sɔ kpikple qaxo de sɔ do onyi na do kplan onu sɔn wal̄ xena ye na do a do gbɔn akpa na SIDA we adɔn wu. Onukplan-ɛmɛtɔye kpo onukplanviye sɔn otota vwe-vweye mε do va. Ajwavi, Afi kpo Asiba, yee can nɔ kpikple la we tɛnχo. Ye bo hεn ye nɔvγε Kɔjɔ do yi, Kofi can bo nɔ e tɛnχo.



Gbedokpo, onukplan-εmetc xeni le njekon na onukpinkplan la qokpo, tεkpɔ Ajwavi bo tun mɔ : « Myɔ kpo nɔvweye kpo, mi na kpewu na kpedo mía wu a do kplan onu sɔn lena ye na hɛn dɔ na ye ɔn do bε SIDA nɔ wu ? Đo, mi nyɔ-ε hugan εmε ɖeye tun e bo le vivɛde tun ye bo na gbɔn akpa na SIDA we adɔn. Mɔ bɔ do e wu, mi nyɔ onu xixle ganji. εmε susu kpɔn onu jɛ e wu tun miye bo nyɔ oxojɔxɔ sɔn owanvi VIH kpo SIDA we adɔn kpo wu. » Ajwavi kpo nɔvγeyε kpo yi ogbe na do wa odan mε la kpo jijwε kpo.



Gbccn na do azan vide, Afi sɔ ede na odan la, bo jε kpikpe do ye wu le onu kpinkplan la mε ji. Vivi dido kpo owan yiyi na εmε etɔn na na εmε susu wle obyo na onu kpinkplan sɔn SIDA we oxojcho wu. Zaandε kpoŋu, e trɔ zun cica onukplan-εmεtɔ adodwe le oto etɔn mε, otovi susu bo nɔ va kplan onu le e de.



Asiba je oyé xení ló oxo són onu kpinkplan SIDAtón wú, titá ji. Kójo tró onukpinkplan we wema laye do ogbe ye tón tete mè. Ye dé wema dökpo tón-e bo do dé onu gónmè són lena ye na wa na ye ón do bë owanvi VIH kpodo lena ye na zón adón na emé xení bë SIDA we adón kpo wú dò.



Ajwavi kpo Kofi kpo nō yō emeyē do va suklu xwe la. Ye nō va yi glo cica laye kpōn tun onu na ye dō ohyan na bo na do kplan onu le ye si jaa. Ye nō do hōnhlōn gbōn a bo dōn hadwe etōnye can va.

Ajwavi kpo Kofi kpo we oha dido jē ḥukōn yiyi ji. Xena Kofi lō na emē etōnye tun he kpo Ajwavi kpo bo jlo na dē heye dē, ye kpōn jījwē taṇu do ye wu. Kjō kpo nōnyē nyūnusiye can yi ogbe. Kofi lō na hadwe etōnye tun he kpo Ajwavi kpo bo fyan jōgbe tun heye bo ḥn nyō amama mē na heye dē nō gbōn a bo va wle alō. Le alō wiwle godo, heye bo na nō ogeji na heye nōnyuye.



Kofi kpo Ajwavi kpo va wle ač. Do yi nɔ, ye va dɔ ovi qɔkpo. Otingɔ xena Ajwavi nɔ yi owan na ganji wε ye kpli do gbedokpo. Ajwavi lɔ tun mɔ : « Bwε la wε mɔ kpo naye kpo nɔ yi owan na nɔ xlɔn saa, bo nɔ do lɔ oxo. »

Kwɛsiba xeni le ovi dε na otɔ kpo onɔ kpo do ku, bo lɔ tun mɔ : « Didaye kpo naye kpo lo jlo-o nɔ vɔ, e nyi tun ye do fɔn bo le εgbε wε, ko dɔi tun oji na jɔ ye do mía wu ! »